

MAHASISWA BEKERJASAMA BERI BANTUAN KEPADA BEKAS PENAGIH

Oleh: Siti Azah Afizah Mohd Lukman



Pengerusi PESATU, Che Muhammad Redzuan Jihad (enam dari kiri) menyampaikan sumbangan kepada orang kena pengawasan di Tumpat.

TUMPAT: Persatuan Mahasiswa Tumpat (PESATU) dengan kerjasama Agensi Anti-Dadah Kebangsaan (AADK) telah menjayakan satu program kunjungan terhadap orang kena pengawasan (OKP) di kawasan jajahan Tumpat pada 22 November lalu.

Objektif utama program itu ialah memberi peluang kepada bekas penagih untuk berinteraksi dan menyumbang semula kepada masyarakat serta mereka mahu menggalakkan golongan OKP terus memainkan peranan aktif dan positif dalam masyarakat.

Dalam wawancara atas talian di aplikasi *Zoom Meeting* bersama Pengerusi PESATU, Che Muhammad Redzuan Jihad, 22, berkata, “setakat ini sudah tiga bulan bantuan diberi secara bulanan supaya mampu memberi kelegaan kepada mereka.”

Program itu telah menyediakan peruntukan sebanyak RM2000 sebulan dan dibahagikan kepada 86 orang penerima berupa satu beg makanan asas yang antaranya berisi beras, susu, gula dan lain-lain.



Mahasiswa menziarahi rumah salah seorang OKP di Tumpat, Kelantan.

Jelasnya, program itu turut mengadakan sesi perkongsian oleh bekas-bekas penagih dadah dengan peserta program untuk meluahkan perasan tentang pengalaman mereka ketika terjebak dalam kancah penyalahgunaan dadah.

Sokongan dan pembabitan masyarakat dalam program pemulihan amat penting untuk bekas penagih. Malah, masyarakat tidak boleh memandang hina dan memperlekehkan golongan OKP yang telah insaf.

Mengulas lanjut, usaha itu dibuat bagi memastikan golongan ini perlu dibimbing dan diberi sokongan secara moral dan fizikal untuk membantu kehidupan mereka kearah yang lebih baik sekaligus menepis stigma negatif terhadap bekas penagih.

“Masyarakat perlu menolak stereotaip dan persepsi negatif terhadap OKP malah, golongan ini memerlukan sokongan daripada masyarakat agar golongan ini sentiasa bersemangat untuk berjuang dari hasutan menagih dadah kembali.” katanya.

Redzuan turut menyatakan sokongan dan harapan untuk melihat golongan OKP ini terus istiqamah dalam melayari kehidupan baru yang bebas dari pengaruh dadah dan kembali berkhidmat dalam komuniti setempat.

Program ini mampu menggalakkan para belia dan masyarakat secara aktif menyokong usaha dan membendung masalah penyalahgunaan dadah, meningkatkan daya kepimpinan sekaligus menjadi peneraju membanteras dadah dalam mewujudkan komuniti yang selamat, sejahtera dan bebas dadah.